

Акафист Пресвятей Богородице пред Ея иконой «Неопалимая Купина»

Празднуем 17 (4) сентября

Кондак 1

Взбранной Воеводе, Пречистой и Богообрадованней Деве Богородице, огнезračныя иконы Своея явлением обрадовавшей Церковь Христову и ея от огненнаго запаления защищающей верныя, похвальное возглашаем пение, Ты же о, Богомати Купина Неопалимая нами именуемая, яко имущая державу непобедимую и милосердие многое, ускори на помощь к нам, требующим Твоего заступления, и от всяких бед свободы зовущих Ти:

Радуйся, Благодатная, купино неопалимая, огненнаго запаления нас избавляющая.

Икос 1

Ангелов Царице и всея твари Владычице Госпоже Богородице, от ангельских ликов горе приемлющая хвалебное пение, сподоби и нас земных и перстных вознести к Тебе гласы хвалы благодарения за премногую милость Твою к роду человеческому. И аще недостойны есми пети Тя по достоянию, обаче Ты, яко Благая, не возгнушайся наших недовлеющих похвал и, яко Сын Твой две лепте вдовицы милостивно прият, тако любоблагоутробно услыши нас, со умилением Тебе вопиющих:

Радуйся, Огнь Божества во чреве Твоем неопально носившая; радуйся, Спасителя падшему человечеству рождшая. Радуйся, силу адову пречистым рождеством

Твоим упразднившая; радуйся, Адама и Еву древняго проклятия свободившая. Радуйся, вочеловечению Единого от Троицы непорочно послужившая; радуйся, Творца небесе и земли безсеменно воплотившая.

Радуйся, Благодатная, купино неопалимая, огненнаго запаления нас избавляющая.

Кондак 2

Видя Моисей на Синаи купину огнем горевшую и не сгоравшую ужасеся, и се бысть глас к нему Божественный от купины: "иззуй сапоги от ногу твою: место бе, на немже ты стоиши, земля свята есть." Сего послушающе и мы, смиреннии, таинство воплощения Бога Слова от Пречистыя Девы, чудом неопалимыя Купины прообразованное, исповедуем и со страхом поклоняемся месту явления Божия, зовуще Зиждителю всяческих: Аллилуия.

Икос 2

Разум человеческий не может постигнуть таинства смотрения Божия, от сложения мира искупление падшего человечества предопределившаго в совете предвечном Триипостаснаго Божества, обаче Духом Святым вдохновеннии, святии Божии пророци издалече предзряще чудо чудес, яко Творец рабий зрак восприимет, спасти хотя дело рук Своих от погибели вечныя, возвещаху прообразы и пророчества неложными имущее совершится искупление рода человека обетованным Икупителем. Емуже Ты, Всечистая, плоть взаимоотновавши, сподобилася еси быти Материю Господа Твоего, внушающаго нам вопити к Тебе:

Радуйся, огнезрачная палато на Херувимах Седящаго;

радуйся, светоносная ложнице Серафимом Повелевающаго. Радуйся, одре Царя великаго верху горы небесныя; радуйся, престоле одушевленный Обладающаго горними и дольными. Радуйся, кивоте освященный божества, святая святых большой; радуйся, стамно всезлатая, в ней же манна спасительная уготовася, плоть и кровь Божественнаго Агнца.

Радуйся, Благодатная, купино неопалимая, огненнаго запаления нас избавляющая.

Кондак 3

Силою Всевышняго действующи, Владычице преблагая, силу естества огненнаго укрощаеши святою иконою Твоею, и многа чудеса ею соделываеши во вселенной. Темже род христианский ублажает Тя гласы хвалебными и в бедах внезапных, наипаче же во время огненнаго запаления к Тебе молитвенно притекает, приемля помощь от Тебе благовременну. Сего ради благодарственно вопием прославльшему Тя Царю Славы Христу: Аллилуия.

Икос 3

Имущи любовь велию к людям искупленным честною Кровию Сына Твоего и Бога, Богомати Пречистая, прияла еси от Него власть строити и покрывати род христианский: Ты бо грешником еси споручница покаяния их пред Творцем, ненадежным надеждо спасения, бедствующим скорая помощи, погибшим взыскание державное, и всякому миру покров. Тебе, милосердой и благолюбивой заступнице нашей за любовь любовию воздающе, смиренномудренне глаголем:

Радуйся, радости всемирная, еюже слезы отъемлются

от очес страждущих и скорбящих; радуйся, прибежище благоотিশное, в немже спасаются обуреваемии бурю страстей житейскаго моря. Радуйся, умолильнице всемогущая праведно движимаго на нас гнева Божия; радуйся, пламень огня угашающая росю молитв Твоих пред Престолом Вседержителя. Радуйся, от грома и молнии соблюдающая предстательством Твоим небесным; радуйся, помощь Твою святую благовременно подающая всякой душе, верно Тебе молящейся.

Радуйся, Благодатная, купино неопалимая, огненнаго запаления нас избавляющая.

Кондак 4

Буря огненная егда найдет на нас внезапно и пламень грады и веси наша обымет, тогда, Госпоже Семилостивая, ускори на помощь к нам беспомощным и иконою Твоею честною защити и избави нас от огненнаго наказания, егоже сотворихомся достойни грех ради наших, Тебе бо грешнии и имамы заступницу непостыдную, на Тя упование наше возлагаем и прославляюще силу молитв Твоих рождемуся от Тебе Спасу мира зовем: Аллилуия.

Икос 4

Слышим и видим чудеса велия от иконы Твоея бываемая, Царица наша всеблагая, юже даровала еси нам во утешение и защиту в несчастиях: се бо и всепоядающий огонь изнемогает в силе своей, пред силою благодатною Твоего пречистаго образа якоже многажды видехом и испытахом, Неопалимую Купину Тя именующе в изображении сего Твоего образа, и пред ним Тебе воспевающе гласы хвалебными сице:

Радуйся, молитвенница неусыпающая ко Христу Богу,

на милость к нам Его преклоняющая; радуйся, кару Божию за беззакония наша от глав наших отводящая. Радуйся, ризою Твоею честною от всяких несчастий нас сохраняющая; радуйся, Матерним покровом щедрот Твоих жилища наша от огня и грома соблюдающая. Радуйся, всемилостивая услышательнице гласов наших молебных в скорби и обстоянии; радуйся, державная скоропомощнице наша во дни тяжких испытаний.

Радуйся, Благодатная, купино неопалимая, огненного запаления нас избавляющая.

Кондак 5

Боготечная звезда, икона Твоя всечестная, Богородице Дево, во всем мире чудес множеством благодатно сияет и просвещает души и сердца человеческия к познанию велия Твоего милосердия, имже род христианский покрываеши и заступаеши, яко Мати благосердная. О сем радуящися благодарим Христа Бога, Тебе, Матерь Свою по плоти, и нам в Матерь по духу даровавшего, и зовем Ему во умилении глубокоцем: Аллилуия.

Икос 5

Видим икону Твою, Владычице, яко воистину купину неопалимую, во огни несгорающую, и присутствием своим жилища человеческия в пламени несгораемыми соделывающую: Тебе бо дадеса благодать свыше, силу естества во чреве Твоем неопально вместившей, сея же благодати и пречистый образ Твой причастен показася, темже от верных Неопалимая Купина наименовася, егоже мы чествуем благолепно, и Тебе хвалебно вопием:

Радуйся, свеще неугасимая, в молитвах за нас у Престола Господа присногорящая; радуйся, огнем любви Божия и наша хладная сердца воспламеняющая.

Радуйся, сению молитв Твоих зной страстей наших прохлаждающая; радуйся, в час скорби и недоумения помыслы душеполезныя нам ниспосылающая. Радуйся, во время безпомощия нашего, егда бедствуем и не имамы помогающаго, на помощь к нам ускоряющая; радуйся, в годину несчастий внезапных державною рукою Твоею от погибели нас исхищающая.

Радуйся, Благодатная, купино неопалимая, огненнаго запаления нас избавляющая.

Кондак 6

Проповедует Церковь Христова чудеса Твоя, Богородительнице, яко песка морскаго и звезд небесных множае суть; от востока бо и до запада хвально имя Твое чудесы и несть града или страны идеже не совершися Тобою действо силы Божия во избавление и спасение, просвещение и исцеление людей христоименитых, наипаче же чрез иконы Твоя святая обикла еси чудотворити, изливающи от них струи милости и щедрот бедствующему и болящему человечеству. Сего ради славословим Тя гласы песний духовных, и вопием Сыну Твоему и Богу нашему: Аллилуия.

Икос 6

Возсияла еси в светолитии божественныя славы, Дево Богоотроковице, Младенца и предвечнаго Господа Иисуса Христа на руку Твоею держащи и ликом сил Ангельских окружаема, якоже Тя видим на иконе изображенную, Моисейскую Неопалимую Купину таинственно пронареченную, от неяже дары благодатныя верным даруеши, от огня и грома спасаеши, недужные врачуеши, скорбящии утешаеши, и всем вся благая и душеполезная ниспосылаеши, во еже

пети Тебе гласы немолчными сице:

Радуйся, о Нейже радуется и торжествует ангельский собор и человеческий род; радуйся, Еяже слава превосходит похвалы земныя и небесныя. Радуйся, от горних высот всю вселенную Матернею любовью Твоею надзирающая; радуйся, юдолю земную многоскорбную благодееянии Твоими посещающая. Радуйся, неисчетною благостынею Твоею не оставляющая презренныя и отверженныя; радуйся, сердоболием Твоим от рова погибельнаго исхищающая безнадежных.

Радуйся, Благодатная, купино неопалимая, огненнаго запаления нас избавляющая.

Кондак 7

Хотя Господь явити любовь Свою к людям, искупленным Его Кровию, дарова нам в покров и защиту Матерь Свою пренепорочную и Сию сотвори прибежище благоотишное всякой души христианстей, скорбящей и озлобленной, помощи и милости требующей. Ведуще убо таковое милосердное служение Твое роду человеческому, Владычице Всеблагая, к Тебе очи наша в скорбех возводим, и руце молебно простираем, утешения от Тебя единыя просяще, да спасеши нас предстательством Твоим от скорбей временных и вечных, и сподобиши на земли живых в радости святых пети Богу: Аллилуия.

Икос 7

Дивно прославила еси чудесы икону Твою святую Неопалимая Купина именуемую, Богородительнице Дево, еюже грады и веси от запаления огненнаго и молниеноснаго грома соблюдаеши и дома верных благословляеши, в нихже чествуется благоговейно

пречистаго лика Твоего подобие. Сего ради, яко дар многоценен, образ Твой благодатный радостно приемлем, достодолжным поклонением почитаем, и Тя по долгу ублажаем благохвалении сими:

Радуйся, алавастре врачевания на всяк недуг врачевство содержащий; радуйся, мироположнице благоухания Христова, благоухавшая падшее человечество. Радуйся, узы греховныя разрешающая кающимся грешником; радуйся, пленицы страстей сокрушающая подвизающимся о чистоте. Радуйся, дев младопитательнице и матерей тихое веселие; радуйся, вдов заступнице и сирот благосердное призрение.

Радуйся, Благодатная, купино неопалимая, огненнаго запаления нас избавляющая.

Кондак 8

Странно есть видети, яко икона Твоя, Владычице, на доске написанная и по естеству своему огненному действию подверженная, силу пачеестественную являет и присутствием своим силу огня укрощает. Познающе в сем силу Божию и Твоих молитв действие, величаем возвеличившаго Тя Зиждителя всяческих Бога, во отраду и утешение нам даровавшаго образ Твой чудотворный и сим спасающаго нас от огненнаго запаления, да присно зовем Ему благодарственно и хвалебно: Аллилуия.

Икос 8

Весь мир христианский славит имя Твое, Преблагословенная Марие Богородице, и всякому верному сладостно и утешительно есть взирати на пречистаго лика Твоего подобие, имже обикла еси являти многая и преславная чудеса. Се и мы,

смирении, Твою святую икону видяще, боголепно ей поклоняемся и с любовью ю лобызаем, чающе от нея помощи и заступления Твоего державнаго, наипаче во время безпомощия нашего, егда грех ради наших огненное запаление на ны найдет внезапно, да спасаеми Тобою от погибельнаго пламени благодарными усты Тебе вопием:

Радуйся, нерукотворенная скиния Бога Слова, Херувимы превысшая и Серафимы превосходящая святынею и чистотою; радуйся, облаче легкий Солнца Правды, имже Небесный к темным прииде, да на небо с Собою возведет. Радуйся, райския двери отверзшая падшему человечеству Рождеством Твоим святым; радуйся, небо и землю воедино совокупльшая во еже пети Тебе и Рождшемуся от Тебе немолчныя хвалы. Радуйся, Божественный источниче, Воду жизни источивший, от негоже пьющии ктому не умирают; радуйся, грозд спасения возрадившая благословенная лоза, вино бессмертия искапающий человеком.

Радуйся, Благодатная, купино неопалимая, огненнаго запаления нас избавляющая.

Кондак 9

Всяку похвалу превосходит слава Твоя, преблагословенная и препрославленная Матерь Господа нашего; недоумевают бо и уми безплотнии пети Тя по достоянию, тем паче же нам земным и перстным сие неудобно есть, обаче любовью к Тебе побеждаеми, дерзаем приносить Тебе посильное пение хвалы и благодарения за премногую милость Твою к роду человеческому, егоже возлюбила еси и емуже благотворити не престаеши, подвизающи всяк возраст верных взывати рождшемуся от Тебе Спасу Христу:

Аллилуия.

Икос 9

Ветии человечестии изнемогают постигнуть велию тайну Твоего приснодевства, Богородительнице, юже утаи Господь от премудрых века сего и верою откры смиранным и благоговейным, пытливаго испытания чуждым, от нихже православно и несомненно до рожества и в рожестве, и по рожестве Дева проповедуешия. Приими убо, о, Мати и Дево, и наше о сем исповедание вседушевное и укрепи нас последовати Тебе житием непорочным и сердечною чистотою, да возможем благоугодно воспевати к Тебе песни сицевыя:

Радуйся, крине белоснежный девства и чистоты, неувядаемо цветущий горе; радуйся, к девству и чистоте, невидимо руководствующая живущих доле. Радуйся, матерство и девство в Себе чудно сочетавшая; радуйся, во обою непорочно и свято Себе соблюдшая; радуйся, иноческих ликом предводительнице в девстве Благоугоднем; радуйся, девственных полков начальнице в чистоте души и тела.

Радуйся, Благодатная, купино неопалимая, огненнаго запаления нас избавляющая.

Кондак 10

Спасение человеческое устрояя Един от Троицы воплотитися от Тебе изволи, Богоневесто Владычице, естество человеческое прославив седением одесную Отца на Престоле Божества, яко Сын Единородный, Тойже и Сын Твой по плоти бысть и Тебе с Собою прослави славою, превысшею всякия славы, еяже добротою осеняема, не забываеши милостивно род человеческий, но молитвенно предстательствуеши пред Творцем, в

Троице Единым, о всех верно поющих Ему славословия
песнь: Аллилуия.

Икос 10

Стена еси девственным ликом и иноческим собором,
Богородице Дево, всем усердно к Тебе в молитвах
притекающим, икону же Твою святую благоговейно
чествующим; Тебе бо единой даровася от Господа
благодать всемирнаго заступления и верных в девстве и
чистоте утверждения. Темже непорочнаго жития
рачительне под Матерний покров Твой от бури страстей
прибегают, и благоотышии душевное находят, согласно
Тебе взывающе:

Радуйся, иноков и инокинь благочестивых изрядная
покровительнице и теплая к Богу о них ходатаице;
радуйся, тайных среди мира рабов Божиих всегдашняя
помощнице и в подвизех духовных руководительнице.
Радуйся, юных наставнице целомудрия и воздержания;
радуйся, старцев благоговейных упоение и отрадо.
Радуйся, дома и семейства христианския осеняющая
благим Твоим покровом; радуйся, всяк возраст верных
сподобляющая Твоего благосерднаго попечения.

Радуйся, Благодатная, купино неопалимая, огненнаго
запаления нас избавляющая.

Кондак 11

Пение хвалебное приносит Тебе немолчно святая
Христова Церковь, всепетая Владычице, возвещающи
милости Твоя и чудеса, имиже обогатися вся вселенная.
Воистину, кто бо, яко Ты скоропослушлив есть к
молитвенным прошениям нашим? Но и самая прошения
обыкла еси предваряти, милующи и ущедряющи
требующих помощи Твоея святыя, еяже не лиши и нас

смиренных, в час сей поющих во славу имени Твоего и вопиющих Богу: Аллилуия.

Икос 11

Светозарная Твоя икона, Богомати Пречистая, просвещает потемненные грехми души наша сиянием божественных чудес, в нихже познаем Божия всемогущества силу и Твое милосердие неисчетное, присно готовое способствовати нам в покаянии и обращении от злых дел на путь спасения. Молим убо Тебя, Всеблагая, не остави нас заблуждати в дебрях грехов и страстей, но приведи к тихому пристанищу благочестнаго и богоугодного жития, да возможем достойно приносить Тебе сия песнопенныя дары:

Радуйся, враги наша невидимыя запинаящая бодренною Твоею молитвою; радуйся, сим не попускающая обладати нами насилием смертнаго сего телесе. Радуйся, яко беси имене Твоего святаго боятся и трепещут; радуйся, яко икона Твоя честная всяку силу диаволу присутствием своим прогоняет. Радуйся, подвижников благочестия укрепляющая в брани духовной со врагами спасения человеческого; радуйся, в час кончины помогающая любовь и веру к Тебе имущим:

Радуйся, Благодатная, купино неопалимая, огненнаго запаления нас избавляющая.

Кондак 12

Благодати Божия причастну исповедуем Твою святую икону, богоблагодатная Дево, и светло торжествуем праздник ея явления во образе со неопалимыя купины сея явльшися, тожде и действо показывает своими чудесы, от огненнаго пламени сохраняющи и соблюдающи жилища наша своим присутствием. Сию убо, яко щит и

забрало, имуще Тебе, помощницу нашу державную хвалами песненными ублажаем и рождшемуся от Тебе Спасителю нашему вопием: Аллилуия.

Икос 12

Поем Тя, Богородительнице, едину надежду и упование наше, исповедуем милости Твоя, не таим чудес Твоих, прославляем неисчетную благодать Твою к роду христианскому, благословляем имя Твое святое, еже воистинну миро изливанное есть любящим Тя, благоуханием духовным исполняющее благочестивыя души. Облагоухай убо и нас, Владычице, смердящих страстьми греховными, и сподоби чистым сердцем и нескверными усты взывати к Тебе:

Радуйся, миро источающая сладостное и душеспасительное, имже умащаются сердца боголюбивая; радуйся, недуги душевные и телесныя врачующая единым прикосновением к иконе Твоей святей. Радуйся, водительнице благая на путь благоугождения и спасения направляющая кающихся грешников; радуйся, лестницею добродетелей возводящая подвижников Христовых ко вратам Царствия Небеснаго. Радуйся, смиренных и терпеливых страдальцев венчающая утешением благодатным; радуйся, изгнанных и гонимых безвинно услаждающая предвкушением блаженства райскаго.

Радуйся, Благодатная, купино неопалимая, огненнаго запаления нас избавляющая.

Кондак 13

О, Всепетая Мати, рождающая всех святых святейшее Слово, и Неопалимая Купина от нас недостойных именуемая! Вонми гласу молений и пений наших, пред

святою иконою Твоею усердно Тебе возносимому, и теплою молитвою Твоею ко Господу огня временного и вечного избави нас, хвалящих имя Твое и прославляющих чудеса Твоя, Сыну же Твоему и Богу нашему вопиющих: Аллилуия.

(Этот кондак читается трижды, затем икос 1 и кондак 1)

Икос 1

Ангелов Царице и всея твари Владычице Госпоже Богородице, от ангельских ликов горе приемлющая хвалебное пение, сподоби и нас земных и перстных вознести к Тебе гласы хвалы благодарения за премногую милость Твою к роду человеческому. И аще недостойны есми пети Тя по достоянию, обаче Ты, яко Благая, не возгнушайся наших недовлеющих похвал и, яко Сын Твой две лепте вдовицы милостивно прият, тако любоблагоутробно услыши нас, со умилением Тебе вопиющих:

Радуйся, Огнь Божества во чреве Твоем неопально носившая; радуйся, Спасителя падшему человечеству рождающая. Радуйся, силу адову пречистым рождеством Твоим упразднившая; радуйся, Адама и Еву древняго проклятия свободившая. Радуйся, вочеловечению Единого от Троицы непорочно послужившая; радуйся, Творца небесе и земли безсеменно воплотившая.

Радуйся, Благодатная, купино неопалимая, огненного запаления нас избавляющая.

Кондак 1

Взбранной Воеводе, Пречистой и Богообрадованней Деве Богородице, огнезачная иконы Своя явлением обрадовавшей Церковь Христову и ея от огненного запаления защищающей верная, похвальное

возглашаем пение, Ты же о, Богомати Купина Неопалимая нами именуемая, яко имущая державу непобедимую и милосердие многое, ускори на помощь к нам, требующим Твоего заступления, и от всяких бед свободы зовущих Ти:

Радуйся, Благодатная, купино неопалимая, огненного запаления нас избавляющая.

Молитва

О пресвятая и преблагословенная Мати сладчайшаго Господа нашего Иисуса Христа! Припадаем и поклоняемся Тебе пред святою и пречестною иконою Твоею, еуже дивная и преславная чудеса содеваючи, от огненного запаления и молниеноснаго грома жилища наша спасаеши, недужныя исцеляеши и всяко благое прошение наше во благо исполняеши. Смиренно молим Тя, всесильная рода нашего заступнице, сподоби ны, немощныя и грешныя, Твоего Матерняго участия и благопопечения. Спаси и сохрани, Владычице, под кровом милости Твоея богохранимую страну нашу, власти и воинство ея, Церковь Святую, храм сей (или: обитель сию) и вся ны, припадающия к Тебе с верою и любовию и умиленно просящия со слезами Твоего заступления. Ей, Госпоже всемилостивая, умилосердися на нас, обуреваемых грехми многими и не имущих дерзновения ко Христу Богу просити Его о помиловании и прощении, но Тебе предлагаем к Нему на умоление, Мать Его по плоти; Ты же, Всеблагая, простри к Нему богоприемней руце Твои и предстательствуй за нас пред благостию Его, просящи нам прощения прегрешений наших, благочестиваго мирнаго жития, благия христианския кончины и добраго ответа на Страшнем

Суде Его. В час же грозного посещения Божия, егда огнем возгораются дома наша или молниеносным громом устрашаеми будем, яви нам милостивное Твое заступление и державное вспоможение, да спасаеми всесильными Твоими ко Господу молитвами, временнаго наказания Божия zde избегнем и вечное блаженство райское тамо унаследуем, и со всеми святыми воспоем пречестное и великолепое имя покланяемя Троицы, Отца и Сына и Святаго Духа, и Твое велие к нам милосердие во веки веков. Аминь.

Тропарь, глас 4

Иже в купине, огнем горящей и несгораемей, показавый Моисеови Пречистую Твою Матерь, Христе Боже, Огнь божества неопальне во чреве приемшую и нетленну по рождестве пребывшую, Тоя молитвами от пламене страстей избави нас и от огненных запалений град Твой сохрани, яко многомилостив.